

Noticia
Transparente
di Gobierno

ISLA ONLINE

Diamars 9 Juli 2024

Email: IslaOnline@gobierno.aw Tel: 528-4952



**STABILIDAD
Y
PROSPERIDAD**
2 0 2 4

Gabinete Wever-Croes



PROME MINISTER A TENE SU PROME REUNION CU SECRETARIO DI ESTADO NOBO SEÑOR ZSOLT SZABÓ



Diamars mainta, Prome Minister Evelyn Wever-Croes tabata tin e prome reunion cu Secretario di Estado pa Relacionnan den Reino nobo señor Zsolt Szabó. E meta di e reunion tabata pa por a cera conoci cu otro, y papia riba e prioridadnan di ambos banda.

Durante e reunion, Prome Minister a informa señor Szabó riba con Aruba ta para actualmente, cu e economia ta bayendo bon, turismo ta creciendo, desempleo a baha, y inflacion ta bahando. Tambe a inform'e riba e desaroyonan financiero, y a splic'e cu Aruba ta e unico pais den Reino cu tin dos presupuesto cu un surplus, y cu e prioridad awor ta pa traduci e progreso aki, den bienestar di e ciudadanonan di pais Aruba pa yuda tur hende cu e poder di compra y combati pobresa. Ta importante pa menciona cu Gobierno ya caba a cuminsa cu esaki, hisando pension

di biehes, hisando bijstand, dunando ambtenaarnan un indexering, y dunando aumento di salaris na esnan cu ta gana awg 2500 of menos den sector priva.

Prome Minister tambe a menciona e retonan cu tin actualmente, di cual un ta e negociacion cu Hulanda cu awor tin cu cuminsa cu e gobierno nobo pa asina purba yega na un interes abou definitivo pa cu e debe di covid. Otro temanan importante ta e cambio climatico y e transicion di energia.

“E reunion a bay den bon ambiente, na unda a haci palabracionnan di con lo bay traha y comunica cu otro, sperando asina cu e relacion di trabou ta bay ta uno fructifero. Secretario di Estado Szabó lo ta bishitando Aruba den luna di Augustus pa asina cera conoci cu e isla, y pa e tin un miho bista di e trabou duro cu Gobierno y comunidad en general a bin ta eherciendo pa hiba e pais padilanti”, Prome Minister a remarca. ■





Proyecto PASADIA

PA FORTALECE CONTACTO SOCIAL DI ADULTONAN MAYOR Y ALIVIA E PRESION Ariba CUIDO INFORMAL



socialmente isola y cu tin un red social limita.

Meta di Pasadia:

1. Mantene Independencia: Percura cu Adulto Mayor por sigui biba independientemente den nan cas mas largo cu ta posibel.
2. Alivio di Cuido Informal: Alivia e presion riba famianan y otro cuido informal.
3. Alivio di Cuido Primario: Disminui e necesidad pa hospitalisacion y cuido intensivo.
4. Prevencion di Hospitalisacion: Preveni cu Adulto Mayor ta drenta hospital of cas di cuido innecesariamente.

Implementacion y Plan pa Futuro:

E proyecto Pasadia lo wordo implementa den diferente fase, cu ta cuminsa cu e establecimiento di proyecto di dia na Santa Cruz, San

Durante conferencia di prensa dialuna 8 di juli, Minister Arends, encarga cu Asuntonan di Adulto Mayor a anuncia introduccion di Pasadia: Un Programa di Dia pa Adultonan Mayor Vulnerabel na Aruba.

Pasadia ta un proyecto innovativo di dagverblijf cu ta diseña pa yuda e adulto mayor biba un bida independiente, fortalece nan contacto social y alivia e presion riba cuido informal.

Pasadia ta duna adulto mayor e oportunidad pa tuma parti den diferente actividadnan, cu enfoca riba mehora nan calidad nutricional y nan involucracion social. E proyecto ta principalmente pa adultonan mayor cu ta core riesgo di keda

Nicolas, y otro localidadnan. Ministerio di Adulto Mayor lo sigui cu mas ampliacion y colaboracion cu entidadnan existente.

Pasadia ta un proyecto cu ta wordo realiza den colaboracion cu diferente organisacionnan, incluyendo: Wit Gele Kruis, FCCA, SABA, Buurtzorg, Cas Marie, YMCA y Rode Kruis.

Ministerio di Asuntonan di Adulto Mayor ta haci un yamada na tur partido y e comunidad pa traha hunto pa e implementacion exitoso di Pasadia. Door di esfuerzo colectivo, nos por crea un ambiente di sosten unda nos adulto mayor por biba cu dignidad y cuido di calidad. ■■■■

Minister Ursell Arends:

PROYECTO PASADIA LO TIN 10 FACILIDAD OPERACIONAL PA FIN DI AÑA AKI



Ayera durante rueda di prensa Minister Arends a duna di conoce cu e proyecto di dagverblijf, esta opvangst pa Adulto Mayor durante dia, lo tin 10 lugar operacional pa di 2024.

Lo tin 3 tipo di PASADIA;

1. Concepto completo unda cu ta habri un lugar nobo y ta wordo opera for di un ekipo exclusivamente dedica na PASADIA. (preto ariba e mapa)
2. Concepto ehecuta cu un instancia existente haciendo uzo di operacion y facilidadnan di esakinan. (blauw ariba e mapa)
3. Concepto satelite unda cu instancianan ta opera como concepto di PASADIA pero no ta ricibi fondo di Gobierno. (cora ariba e mapa)

Di e concepto completo lo habri 5 PASADIA na e siguiente localidadnan; Oranjestad, FCCA Cunucu Abou, FCCA

Paradera, Kibrahacha y Praktijk di Dokter na San Nicolas.

Di e concepto colaborativo lo habri 4 PASADIA den colaboracion cu Cas Marie San Nicolas, Cas Marie Santa Cruz, S.A.BA. Oranjestad y S.A.B.A. San Nicolas.

Finalmente na Rode Kruis San Nicolas lo habri e di tres concepto unda cu e instancia lo percursa pa educa y prepara su ekipo pa opera como un PASADIA.

E imenso esfuerzo aki pa duna nos grandinan e apoyo necesario for di un cuadro social lo hisa nan calidad di bida y a la bes alivia nos sistema di cuida ariba Aruba.

Ministerio di Asuntonan di Adulto Mayor ta gradeci tur partner di PASADIA pa comparti nan vision y traha ariba e Aruba cu nos grandinan merece. ■

Minister Ursell Arends:

PROME EDICION DI GOLDEN AGE EXPO CU ACOGIDA GRANDIOSO DI ADULTONAN MAYOR



Diasabra ultimo den ballroom di Alhambra, e prome edicion di Golden Age Expo a tuma luga. E evento a destaca exitosamente e bienestar y estilo di bida di nos adulto mayor y esnan cu ta baha cu pensioen. E evento dedica na promove un embehecimento activo y prepara pa un pensioen responsabel, a mira un asistencia y participacion grandi di e comunidad.

Minister di Asuntonan di Adulto Mayor, Sr. Ursell Arends, a expresa gran alegria y agradecimento durante su discurso. "Como Minister pa Asuntonan di Adulto Mayor, e proyecto aki tabata uno cu nos tabata ansioso pa tuma luga for di hopi tempo caba, subrayando e necesidad y exito anticipa di e iniciativa. E ta alinea cu nos vision di promove embehecimento activo y tambe cambio pa un perspectiva mas social di



embehecimento. Nos ta logra esaki door di colabora cu esnan cu tin nos adultonan mayor na pecho, facilitando cooperacion entre proveedornan di servicio y cuido, y alivia e carga riba famianan y di cuido informal. Asegurando cu nos adultonan mayor ta disfruta di un bida saludabel y digno cu nan merece."

E Golden Age Expo a demostra cu nos ta riba e caminda corecto. Un evento dedica especificamente na nos adultonan mayor y esnan yegando nan edad di pensioen, abordando nan necesidadnan pa mas cuido, actividad, y integracion continuo den nos sociedad.


Tabata tin diferente booth cu expertonan den conseho medico, finanzas, vivienda, utilidad y mas, empoderando nos adultonan mayor cu e conocimiento y recursonan necesario pa biba nan miho bida.

Minister Arends ta extende palabra di danki na e organisadonan, Vibrations PR & Media y tur cu a haci e evento posibel, felicitando nan riba e exito di e prome edicion di Golden Age Expo. ■■■





PROYECTO DI "ARUBA HAPPY ONE PASS" (AHOP) TA DEN SU FASE FINAL



Minister di Turismo y Salud Publico sr. Dangui Oduber su meta y vision ta pa sigui innova y haci uso di tecnologianan moderno pa asina facilita servicio y procesonan pa nos biaheronan cu ta bishita Aruba.

E industria di biahe rond mundo ta transformado pa asina facilita e procesonan di biahe door di implementacion di tecnologia. Aruba no ta keda atras y asina awe Aruba ta bay tin un sistema di "facial

recognition" y Digital Travel Credentials pa asina verifica e pasahero su identidad ora di drenta y sali di Aruba, cual ta bay duna un servicio unico y rapido pa nos bishitantenan. Aruba por ta orguyoso pa ta e prome den caribe pa cuminsa cu un plataforma digital y conhunto cu nos partnersnan; SITA, Indicio, Inmigracion di Aruba, Aruba Tourism Authority, nos ta premira cu pa fin di 2024 lo por haci uso di e sistema AHOP aki na Aruba.

Aruba a cuminsa e proyecto aki na aña 2022. Dia 5 di November 2023, a lansa un programa piloto unda a demostra con e biaheronan por demostra nan informacion via un sistema di Facial Recognition y Digital Travel Credentials (DTC). Informacion ta keda warda den e biahero su telefon mobil y e biahero lo duna consentimiento pa comparti su informacion cu inmigracion di Aruba, sin ningun retencion di informacion den e database di cualkier tercer partner. Ora yega Aruba, e sistema di inmigracion lo usa control biometrico pa completa e proceso di control di frontera. Asina aki e biaheronan por pasa den un proceso rapido via un "E-Gate Machine" y esaki ta verifica tur e credentialnan conforme cu inmigracion su rekisitonan.

E proyecto aki a ser reconoci como e prome na mundo, segun documentacion di Aruba su prome video. Te awe, mas cu 500 biahero a pidi pa participa den e programa piloto. Aruba ta riba e caminda pa implementa AHOP pa entrada y salida di nos isla pa fin di aña 2024.

Aruba ta yama Curacao Bon Bini pa muestra interes tambe den un proyecto similar di viahe cu credencial, pasobra e ta alinia cu e direccion di evolucion di e industria di biahe. Sinembargo, Aruba ta enfatiza e importancia di tin un metodo sistemático, cu ta traha hunto, denter di e islanan.

Aruba ta spera pa mantene su liderazgo den e area aki y duna un danki na na tur biahero cu a participa na e proyecto y cu a haya oportunidad pa experiencia e conveniencia di biahe aki cu Aruba ta ofrece.

Minister Dangui Oduber sigur ta orguyoso cu e proyecto di "Aruba Happy One Pass" ta birando un realidad. Aruba un biaha mas lo ta un "trendsetter" y lider den innovacion den Caribe. Biaheronan pa Queen Beatrix Airport pronto ta bay haci uso di un tecnologia avansa cu ta bay pone Aruba como pionero den innovacion y esaki ta un progreso pa henter e industria di turismo y hospitalidad. Minister Oduber semper a kere den innovacion y ta opta pa sigui desaroya ariba solucionnan y colaboracion pa keda mehora nos producto Aruba.

Minister Dangui Oduber:

CANTIDAD DI SCOLNAN PARTICIPANDO NA E PROYECTO DI SCOL SALUDABEL A SUBI DI 10 PA 15



E programa di Scol Saludabel ta forma parti di e Plan Nacional di prevencion di malesanan no transmisibel. Minister Oduber a splica cu e plan aki ta un plan integral cu a cuminsa na aña 2020 pero a para door di e pandemia. Pero manera cu pandemia a pasa e plan nacional di prevencion a cuminsa continua mas lihe posibel.

Tres ministerio ta uni pa duna sosten financiero na un programa cu ta enfoca den crea un estilo di bida saludabel y asina logra implementa un rutina di come saludabel pa alumnonan aki na Aruba.

Den e programa Scol Saludabel no solamente ta enfoca riba salud fisico pero tambe riba salud mental, movecion y bienestar total di e muchanan. Mas salud un mucha ta, mas productivo e ta den bida.

Minister Oduber ta kere firmemente den campananan y programanan di prevencion. Prevencion ta e yabi pa tin un fondo di AZV cu ta keda sostenibel den futuro y pa haci esaki posibel nos mester cuminsa na nos muchanan. Cu gran orguyo Minister Dangui ta informa pueblo cu a bai di tin 10 scol cu ta participando na e programa, pa 15 scol.

Un danki na departamento di salud publico / Jeugd Gezondheids Zorg, departamento di asuntonan social, SKOA, SPCOA, IPA, DPS y GSA pa nan participacion na un manera hopi activo. Nan ta sigui traha cu e meta pa logra tur scol aki na Aruba pa ta ariba e programa di Scol Saludabel.

Minister Oduber ta sigui traha pa concientiza nos muchanan na Aruba pa hiba un bida saludabel cu sigur lo contribui na un desaroyo positivo pa nos pais. ■■■





MINISTER

Geoffrey Wever

SERIE DI "CREATIVE ENTREPRENEURSHIP WORKSHOP" NA SAN NICOLAS A CULMINA EXITOSAMENTE

The Hub, San Nicolas, tabata e anfitrión di un serie di "workshop" dedica na desaroyo di "Empresaria Creativo". E serie di tayer a inicia 21 di februari, tabata tin 12 tayer en total y a toca 20 tema diferente. Diabierna ultimo a culmina cu entrega di certificado na tur esnan cu a completa e workshop aki exitosamente.

E iniciativa aki ta forma parti di un plan/maneho holistico di Minister Geoffrey Wever pa stimula empresaria den e sector creativo, cu enfoca economico na e area di San Nicolas cual ta e area cu Minister Wever a identifica como e area cu potencial pa e desaroyo di e sector creativo. Minister Wever, ta kere cu San Nicolas mester bira e capital creativo di Aruba.

'Esfuersonan manera esaki conhuntamente cu ehecucion di e plan di revitalisacion di e infraestructura di e area lo crea e condicionnan pa acelera e desaroyo economico pariba di brug', minister Wever a indica. E plan di revitalisacion ta den e fase final di preparacion, segun e mandatario. 'Creatividad ta mara na e capital humano, cu e guia y sosten adecua nos hendenan por contribui efectivamente na genera rikesa y balor, genera empleo y crea un impacto social positivo pa nos pais'.

E tayernan tabata bon asisti, cu asistencia regular di 30+ persona, finalizando cu un grupo di 20 persona cu a logra finalisa exitosamente - participando na 9 of mas tayer. E personanan aki a demonstra nan compromiso y dedicacion. A toca diferente tema, cada uno dirigi pa fortifica e capacidadnan y conocementonan di e empresario den e sector creativo.

Minister Geoffrey Wever, no por tabata presente na e ceremonia, pero si kier a expresa su gratitud na e ekipo organisador di IDEA, y tur e presentadornan, y ta desea participantenan exito den nan trayectoria empresarial.





MINISTER ENDY CROES TA FELICITA E 196 GRADUADONAN DI COLEGIO ARUBANO HAVO CU A HAAL NAN DIPLOMA



Diabierna ultimo, Minister di Enseñansa y Deporte Endy Croes acompaña pa su kerida esposa Dilailah Croes tabata presente na Ceremonia di Graduacion di Colegio Arubano Havo. A inicia e ceremonia oficial cu Himno Nacional di Aruba. E aña aki un total di 196 estudiante a gradua y haya nan diploma di Havo. Durante e ocasion special aki, rector di Colegio Arubano Sr. Tim Croes a hiba palabra. Despues Minister Endy Croes a dirigi palabra na e graduadonan, felicitando nan pa nan esfuerso y dedicacion pa haal nan diploma.

Minister di Enseñansa a indica cu den bida nos perde hopi cos, pero e diploma y e conocimiento cu bo ta adkeri durante bo estudio ta pa semper. Fuera di esaki, e studentenan di Colegio Arubano a presenta un bunita show di baile. Un momento hopi bunita tabata ora e docentenan di Colegio Arubano a presenta un bunita cancion dedica na e graduadonan. Minister Endy Croes hunto cu Rector Tim Croes a anuncia e miho graduado di Colegio Arubano Havo, esta Shae Brokke.

Finalmente, Minister Endy Croes ta gradici rector di Colegio Arubano Sr. Tim Croes, docente y staf cu a guia e studentenan pa haal nan diploma. Pa finalisa, e mandatario di Enseñansa ta felicita e studentenan cu a haal nan diploma di Havo. ■■■





Minister Endy Croes:

EMOCIONANTE CEREMONIA DI GRADUACION DI EDUCACION PROFESIONAL BASICO (E.P.B.) SECTOR ECONOMIA

A otorga diploma na un total di 68 graduado



Dialuna ultimo, den e ballroom di E.P.B. Oranjestad a tuma luga Ceremonia di Graduacion di e alumnonan di sector Economia. Minister Endy Croes acompaña pa su kerida esposa Dilailah Croes – Odor tabata presente pa celebra e logro aki cu e 68 graduadonan. A inicia e ceremonia oficial cu himno di Aruba canta pa e docentenan di e scol. Durante e ocasion special aki, director di E.P.B. Sr. Erwin Lopez a hiba palabra.

Despues Minister Endy Croes a dirigi palabra na e graduadonan, felicitando nan pa nan esfuerso, perseverancia, dedicacion y determinacion cu a duna su fruto y awe nan a obtene nan diploma. Minister di Enseñansa a indica cu den bida nos perde hopi cos, pero e diploma y e conocimiento cu bo ta adkeri durante bo estudio ta pa semper. Alabes a encurasha e studiantenan pa sigui studia. Tambe, e mandatario di Enseñansa a papia tocante e importancia pa aplica e 4-D nan pa ta exitoso, cual ta deseo, disciplina, dedicacion y determinacion.



E miho graduado di E.P.B. sector Economia:

ABS2D: Dianne - Ezzard Solognier

C4A1: Anaïs Helder

A4U1: Nicolaas Madrigal – Ocampo

A 4D1: Shaylee Tromp

Den nomber di Gobierno di Aruba, Minister Endy Croes a felicita e graduadonan. Alabes, Minister Endy Croes ta gradici directiva di S.E.P.B, director Sr. Erwin Lopez, staf, mentor, docente- y mayornan cu a contribui den e logro di e graduadonan y desea tur graduado hopi exito den nan futuro. ■■■



2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

